

Rinchinchète 2012.

Maîy nos-a toûrné l' dos, c'est l' coron d'one anéye ;
Dji cause di nosse sicole, li rinchinchète èst là.
On va r'mète lès diplomes, èt come l'anéye passéye,
Quî ç' qui dîrè l' contraîre, tot l' monde a s' keûr qui bat.

Véci, tortos èchone, on-z-èst pêrcé binaujes ;
Tènowète on-z-a rî ! On-z-a branmint bouté ;
On dîrè ç' qu'on vôrè, mins gn-a nuk qu'è-st-à s'-t-auje :
On-z-a fait ç' qu'on-z-a p'lu, c'est l' maïsse qui va jujer.

Nosse Pôl nos-a apris dès novias spots à r'laye ;
I n's-a d'mandé d' lès r'lîre cinq ou chîs côps pâr djoû :
« Purdoz qu' c'est vos pâters, c'è-st-insi qu' faut qu' ça vaye,
On n' vint nin po djouwer, mins po-z-aprinde do nôû ! »

Après ? Ça n' va nin mia ! C'est lès régues di grammaîre !
Minme s'i chonereut co bin qu' t'è-st-à mitan chapé,
C'est lès « condicionél, subjonctif », c'è-st-à braîre,
Faurè bin fé avou, mins gn-a nin d' qwè s' vanter.

Ane-Mariye, qui sorît, c'è-st-one vraîye dame di scole ;
Èle ni saureut r'niyî qu' ç'a stî s' prumî mèstî .
Èle vos-èbèguinéye, catchîye drî si rwèd col,
Mins èlle èst là tofêr, po vos rècoradjî.

On n' piéd rin po ratinde, pace qu'i d'mère li pus bèle,
On bin riv'nant visadje, èt on si bia p'tit nom ;
On djoû, dj'a bin manqué d' lî brûler one tchandèle :
T'aureus dit qu' po ç' djin là, tot èsteut todi bon.

Mins dj'a yeû rade compris qu' padrî lès-aparences,
I-gn-aveut one Chantal qu'a gangnî sès galons ;
Avou lèye, nin moyin d' djouwer à fé lès cwances,
Èlle a branmint bouté, èle li coneut, l' walon.

On-z-aveut stî prév'nus qu'avou sès-ègzèrcices,
Èle nos freut tracasser, èt souwer, èt paumer ;
Mins ça nos-a apris qui, si ti n' prinds pont d' risses,
Èstô d' fé dès progrès, ti d'mèrrès su l' costé.

Ci qu'èle vout apwarter, c'è-st-one paurt d'èritadje
Qu'èlle a bin rachoné pus d' vint' anéyes au long
À lîre èt à studî tos lès pus bias scrijadjes
Qui tos nos ratayons avin.n' fait en walon.

Èle mi dismintirè s'i lî chone qui dji m' brouye :
Si dj' di qu'èlle a yeû l' chance di crwèsèr nosse Lucyin,
Èt s'atèler zèls deûs à porsûre li minme bouye ;
Tot vèyant qu'èlle è v'leut, i d'neut on rude còp d' mwin.

Ni rovians nin, mès djins, qui si n's-èstans èchone
Po s' bin plaîre, audjoûrdu, èt rîre èt bwâre on còp,
C'èst grâce à cès djins là, cès quate là, èt i m' chone
Qui nos lès d'vans r'mêrci tot s' sov'nant qu'on-z-èst d' doû.

On fèl mèrci à vos, Pôl, Ane-Marîye, Chantal,
Po lès maus èt lès rûjes qui v's-avoz sopwarté !
Si vos n' sèrîz nin là ? Nos 'nn'aurin.n' one di cale
Po r'trover nosse walon, li p'lu scrîre èt l' causer.

Sûr èt cèrtin qu' nos-ôtes, con'chant vos caractères
Èt l's-èfôrts qu'on vos d'mande, nos-avans adviné
Qu' c'èst nin po fé chonance, parète ou awè l'aîr
Qui vos spaurdoz sur nos bouneûr èt amichté.

Albert Delvaux

Maîy 2012.